

本朝分省人物考

人物考卷之六十九目錄

江西瑞州府

胡璉

朱益

楊潤

陳政

朱漢

王相

黃山

傅興

謝麟

陳祥

袁州府

劉仲質

龍鍾

劉廸簡

黃子澄

歐陽汝

李香

郭紳

高琬

贛州府

陳勉

黃德潤

董越

袁慶祥

丁積

胡易

黃弘綱

何秦

南安府

蔡原啓

賴禮

劉永

蔣誠

蔣銘

張九達

劉節

黃養蒙

鄭溥

目錄終

本朝分省人物考卷之六十九

江西

瑞州府
贛州府

袁州府
南安府

胡璉

胡璉字商用瑞州府高安人少從豫章陳仲易學尤
邃於易然兩弗偶於有司當時莫不惜之未幾元季
兵起杜門索居惟事親爲務母喪終制弗御酒肉父
旅歿於括蒼時道阻不通璉蒙難蹤跡走二千里卒
負骨以歸人人歎異之歲癸丑五月袁州僞帥歐祥
遣右丞劉敬襲筠陽據之一時名流皆爲所羅否則
必遇害璉獨歛迹遯去甲辰冬大明兵至江西諸郡

望風納款大將軍分兵告贛聲言不亟降者屠其城
劉敬聞之大恐計無所出則謀掠士女金帛火筠陽
退保新昌城中民皆惶懼晝夜號泣璉知事急乃往
見敬麾下僞院判雷均正員外袁友德曰汝等乘時
竊據今日復能有爲乎恐首領不保柰何友德且駭
且問璉曰事已迫矣不早爲之所恐且免釜魚須臾
不復有生意筠城既不能保况新昌乎且天命人心
已歸 真主觀其用兵可知矣大將軍兵之所至無
攻不克無戰不勝迅若電掃汝等固狀此一城生聚
然汝亦困迫就縛矣知者貴知幾失其幾悔無及也

友德默然良久曰君言是也於是乘傳至臨江以其事白于大將軍深喜欲卽官之苦辭不敢願且歸述敬等來降乃賜衣一襲俾還筠陽於是敬等相繼出降城中以戶計者十萬以口計者五倍戶之數皆懼然相慶以爲更生至今遺黎故老告其子孫曰若等得廬爾居佃爾田胡公力也洪武八年擢教句容直諒忠信士子化之未終三年淹以疾歸無復留心世事所著有易學會通年七十有五得疾遺命其子治喪不用浮屠將易簣親友環視強之曰灼艾或可起璉舉手加額曰君子貴知命某年七十五得全歸官

矣言訖遂終

朱 益

朱益高安人永樂末進士授刑部主事獄多平反陞郎中尋卒廉靜寡慾宦游不挈妻孥卒時唯一僕侍命之曰未能報吾君親歸以忠孝二字語吾子孫

楊 潤

楊潤高安人永樂末進士授御史善持法人不敢干以私累陞四川布政司叅議時重慶旱饑潤發官廩全活甚衆歷官三十年囊橐蕭然家居唯務讀書而已天順間進中憲大夫歲給祿米五石年九十一卒

陳政

陳政字以正瑞州府新昌縣人天順甲申登進士第初授工部營繕司主事遇事輒處得宜有豪右侵占畿內官地反誣隣僧政往勘得實皆感服及監收薪炭出納公平無敢厚取以自私者夫役德之將受代爭赴闈下言政不可去遂復留一年績譽日著成化三年姚文敏公爲吏部乃奏改文選司主事辛卯陞驗封員外郎丁酉充副使封遼府長垣王戊戌陞郎中推選補通政司右叅議庚子轉左叅議壬寅進右通政癸卯丁內艱服除轉左通政丁未擢工部右

侍郎尋轉左侍郎是年八月 宣宗升遐奉勅營建
山陵上疏以衰老辭不允 上念督工之勤累遣中
使以勅書下勞并賜羊酒白金等物及工完勞賜之
者尤厚已酉京師大水奉命督修蘆溝橋及内外倉
廩之圮北者辛亥禮部災督工修建皆有勞賜弘治
戊子河溢汴梁之東蘭陽鄆城諸縣皆被其患勢迫
遷道殣不可支議者以地兼河南山東及南北兩畿
事不無難得大臣總理庶克有濟 上命政往又
以為不熟令賦則令不肅兼都察院右僉都御史賜
以重責而行政蒞其境方將度地勢以圖修浚行至

儀真疾作遂卒年五十四訃聞 上命有司諭祭仍治葬事

朱 漢

朱漢高安人成化初進士授太常博士陞南京監察御史彈劾不避累官陝西按察司副使風裁凜然奸貪縮首至今懷之歲時報祀

王 相

王相新昌人成化初進士授監察御史文行重一時未幾以親老歸養二十餘年日與羅一峰遊弘治間起復爲御史陞廣東按察僉事

黃山

黃山高安人成化乙未進士授行人屢奉使不以毫髮自汚尋擢監察御史巡按浙江渝夙弊徵奸貪雖親故無所假借風采動一時陞廣東按察僉事

傅興

傅興高安人性至孝父疾感夢百里外徒步跣求醫得撫絕嶺古井水調藥愈祖母曹氏孀居爲華林賊所掠欲殺之興渡水以救賊以巨橈壓之橈忽斷賊驚異釋之事聞詔冠帶表其門

謝麟

謝麟高安人應例歸生正德初華林賊劫其家麟負母以避賊追尋益迫家人走之走麟曰母在安可棄乎既而賊劫其母麟奮力奪之母獲免竟死于賊

陳祥

陳祥字應和高安人舉進士筮仕上廩多善政服闋補華亭華亭壯邑令恒敗于利辟以令召爲監察御史所至伸冤抑折豪強墨吏望風遁直言危論風振一時當路陰惡出知惠州府祥至斷獄如流民告理齋糧數合計刻白事時有陳半升之謠民有二女嫁爲比鄰堵姊素不孕一日妹產子而姊之妾適同時

產女乃棄其女而號于衆曰妾產子也夜燒妹旁舍
期妹夫婦赴火所乃竊抱其男歸爲己子妹覺往索
之弗予因訟於府無他證不能辨佯言曰必殺此兒
事卽了耳乃置籠注水室下引二婦出取兒密諭一
卒謹視之乃佯怒叱卒詐爲投兒狀復令左右迫二
婦出其家大聲爭救不可得則頗號仆室下姊妾竟
去不顧佯曰事已白矣以兒付妹而杖姊妾一郡以爲
神長禁強寇張林二渠魁負固劫殺祥諭百姓樂業
因號之禁密召所嘗受賊害者授之方略伺其歌飲
一鼓擒之在任三年陞廣東副使廣人習聞其風無

敢作姦三年陞河南叅政分守大梁吏民畏愛陞福
建右布政使未半年遷左布政順天府尹右副都御
史總督南京糧儲尋改巡撫應天等府東南財賦之
地吏多冒沒極力搜剔南畿宴然屢疏乞休尋以嫌
隙被論待勘家居二年朝廷急欲起用詔起論者
蓋併力遂以副都御史致仕年餘卒六十一卒之日
所居荷山北厓墜巨石數十聲如雷

袁州府

劉仲質

劉仲質字文質袁州府分宜人洪武初舉爲宜春訓導有薦仲質好學博通經史者召對稱旨授翰林編修官至禮部尚書十五年詔天下祀孔子增修學校上諭仲質曰孔子明帝王之道以教後世使君君臣臣父父子子子綱常以正彝倫攸叙其功參於天地今天下郡縣廟學並建而報祀之禮止行於京師豈非闕典卿與儒臣其定釋奠禮儀頒之天下學校令每歲春秋仲月通祀之是年設諸殿閣學士職如宋制

命仲質爲華蓋殿大學士 上親製誥文後紹爲監
察御史卒

龍 鐸

龍鐸字德剛萬載人洪武十三年貢爲國子生授浙
江按察司副使降長洲知縣尋陞晉府長史建文中
靖難師起徵兵於晉鐸以大義不可靖難後詔械鐸
至不屈死之有收其遺骨得所自書贊云

劉迪簡

劉迪簡宜春人幼通經學國初徵授尚賓館副使屢
陳時務進皇王大學通旨使交趾卒于南寧所著有

尚賓文集

黃子澄

黃子澄名湜以字行分宜縣人少從邑人歐陽貞受周易周與學受尚書靖江梁寅受春秋博學負俊聲游鄉校同舍避席賦寒江把釣圖及枯梅詩人誦之洪武癸亥膺貢入太學明年鄉試第二名乙丑會試第一廷試及第第三人授翰林修撰尋兼春坊官侍東宮講讀二十五年遷少詹事兼修撰二十七年累遷太常卿 皇太孫立諸王以叔父之尊多不遜服一日 太孫坐東角門召子澄謂曰諸王尊屬各擁

重兵何以制之子澄以漢平七國事爲對 太孫喜
曰得先生謀吾無慮矣及卽位兼翰林學士與齊泰
皆用事時周齊湘代岷五府相繼煽動 上一日朝
罷召子澄謂曰先生憶昔者東角門之言乎子澄曰
不敢忘也然須密退與齊泰謀之奏欲先燕子澄曰
周燕之母弟取周卽剪燕之手足而燕因可圖也入
白之 上遂遣曹國公李景隆圍河南迫周王櫓至
京遷之雲南徙代王樸於邊湘王栢聞討狼狽閩宮
焚死齊王摶囚之京師岷王梗降爲庶人至於燕藩
亦據據其事加誚讓 朝廷以子澄爲功褒賞之時

燕王子高煦高燧皆在京齊泰欲先收之子澄曰不可事覺則彼先有名遂遣歸尋悔追之不及會燕上書救周罪子澄指爲連坐決計討之己卯三月命都督宋忠等北征七月靖難師起首以誅齊泰及子澄爲名遂破雄縣懷來遣長興侯耿炳文禦之互有勝負子澄慮師老遂請 上班師詔以李景隆爲征虜大將軍率諸將兵凡百萬以往景隆自負有文武才上寵信特深甫行餓之江滸賜犀玉帶諸將各一賞賚無算子澄授以指畫景隆依違而已未幾攻北平城累戰皆大敗奔還赦不誅子澄哭諫曰景隆出師

無紀度意在觀望不誅之以謝宗社何以懲將士不職已而徐凱盛庸繼踵敗衄顧成等皆降于澄拊膺大慟曰大事去矣萬死不足贖誤國之罪乃賦一詩以痛詩曰仗鉞爭登天將壇貂裘遠賜朔方寒出師無律真兒戲負國全身獨汝安論將每時悲趙括攘夷何日見齊桓尚方有劍憑誰借哭向蒼天幾墮冠聞者哀之尋用侍臣議詔謫子澄及齊泰於遠方以快敵意其實使之募兵也時諸將猶守淮南而成廟忽渡江矣谷王一云潭王與景隆開門迎附子澄出走蘇州詔執之捕獲責問不服死之命赤其族一子逃

難易姓爲田經宥始復姓家湖廣咸寧孫表登正德
辛巳進士

歐陽汝

歐陽汝分宜人以經明行修舉授開封府學訓導改
永康不受士贊師範嚴整進國子學錄嘗上疏論事
幾得禍祭酒丘文莊器之遷周府長史改伊府致仕
家足跡不造城府時論服其清介

李香

李香字汝蘭號澗山分宜人由進士拜都水主事管
徐州洪洪近例每民船一納錢十半入官半入夫香

痛革之荒疫頻仍多方構糴又借銀買藥剉置衙前井中令人得自汲疫者以甦又查出近洪官地可耕者立義倉四爲備荒計轉刑部擢廣東高肇兵備僉事內艱服闋補山東累官至都察院右副都御史巡撫四川進大理卿各方物臚儀及水手諸名色咸峻却之至瓜州有都蠻距城數百里其酋長偕部下數百人以虎鎗銳劒及諸葛銅鼓來獻用表歸化香命官屬以冠帶員領授其長因教之禮拜又示之訓子弟尚禮儀服貢賦之略諸蠻欣謝而去以疾歸卒

郭紳

郭紳字廷章袁州府宜春縣人溫醇簡默蚤有文譽成化乙未登進士授海寧令興學勸農鋤強惠弱立養濟院以恤困窮葺正學祠以崇節義擢爲御史力持憲體弘治二年擢襄陽知府十一年陞苑馬寺卿歷左布政正德五年陞南京太僕寺卿六年陞南京大理寺卿七年陞南京刑部右侍郎爲人清介不設城府人稱爲長者云

高 瓣

高琬卽劉琬字德資袁州府宜春縣人成化戊辰登進士十九年授上海知縣二十三年丁憂弘治四年

補知松陽縣召爲南京貴州道監察御史十二年陞
松江知府正德元年陞陝西右叅政三年陞湖廣右
布政使五年陞浙江左布政使六年拜右副都御史
撫治鄖陽器貌端重爲政矜嚴持大體曉達民事慎
飭名檢所至舉其職而上海松江之政尤稱最上海
松屬邑也地太賦繁琬至減官糧加耗奏以餘糧編
銀催夫民稱省便官稅徵解歲有羨餘數百金前政
者例受之留貯以葺學舍齋閣解字館傳之敝圯者
鋤抑豪強發摘姦伏屢辨疑獄終其任無敢干以私
聞父喪卽日就道居臺端風裁凜峻出按蜀戎籍持

平不苟稽審有法衆號得體適松守缺松人咸願得
爲守語聞吏部以琬往益前在上海威信旣孚於民
又熟其利病及爲郡益邁往踔厲凡所興革弛張務
建久長用文學飭吏治考大成之樂間詣學宮飲射
讀法率學官弟子親爲講說課試高等者慰寵之飭
陸宣公周文襄之祠表忠節貞孝百廢具興松故饒
財俗尚侈靡身爲儉約先之食不重肉客至豆觴魚
鱠果脯一鉢而已禁饗燕併優雜目不一陳於前撫
鄖時劇寇劉七猖獗連爲鄧襄蜀數州之患都御史
彭公澤專總制受勅調漢土兵併力追勦計畫勞勸

渠黨就獲璽書獎勵有襲衣白金之賜衆方多其功
顧爲言者所抑八年得旨召將別用之琬退過家卽
卧不復仕有司議平賊功猶以白金綵幣卽其家賜
焉 世廟登極推恩廷臣詔賜誥進階通議大夫家
居十五年八十有五履行重一時前後部使數致粟
帛禮於其廬琬三世皆仍姓劉嘉靖壬午子祉領鄉
薦會試禮部始疏於朝復姓高

贛州府

陳勉

陳勉字希進贛州府寧都縣人永樂丙戌進士任廣東道監察御史秩滿陞廣東按察副使未幾召還進左副都御史尋改南京大理寺卿平反獄訟多所建白時論稱之進陞右都御史纏期歲卽上章致仕未幾卒勉外和內剛通法律多吏能臨事敏捷無負其職

黃德潤

黃德潤信豐人正統末進士時英廟北征有內侍

清爲虜謀者德潤知之格殺于庭拜武選主事有武
臣納賄求遷秩德潤抗疏劾之平生廉介方剛明無
私謁病革以家禮授子震曰其以此治吾長無作佛
事以壞家法

童 越

董越字尚矩寧都人生五歲失怙爲母氏所鞠比弱
冠極力孝養以其暇學舉子業補府學天順己卯舉
鄉貢試禮部輒不利卒業國監攻苦力學雖敝巾垢
服名隱起儕輩間成化己丑進士及第初命爲編修
乙未戊戌皆同考禮部時稱得人丁內艱歸用禮事

事舉先世田業讓其兄睦處宗鄉不以貴加人人無
問疏戚貴賤皆樂與之親有訟者懷金以請笑而却
之亦不怨也九載考最進侍講讀癸卯典京闈鄉試甲
辰直 東宮講讀丁未充經筵講官尋以登極恩進
右庶子兼侍講會 朝廷頒朔于朝鮮特命奉使賜
麒麟服以行至則宣德意正王度餽贈無所受居三
日而還乃作賦以紀國俗他所題詠尤多國人錄諸
梓以傳弘治己酉典試南畿辛亥修 憲宗實錄成
擢太常寺少卿兼侍講學士壬子進講敷奏明暢義
歸于正 上每爲注聽賚予尤數癸丑擢南京禮部

右侍郎越博古典習聞本朝故事而職務清簡無絲
自見大夫士議禮者多取決焉三年考績師時其
子天錫已舉進士留累月乃去拜南京工部尚書凡
上供服器藩王張具暨都城内外土木之費日旁午
不絕越應之綽然有餘平生爲文章歌詩典雅優裕
無煩雕琢至是猶不廢著述積所得爲圭峰稿若干
卷壬戌五月以疾卒壽七十二越脩眉長身骨格清
聳雄談健步益疆力而性行恒固量度優遠識者謂
爲壽考之相不意其遽止此惜夫

袁慶祥

袁慶祥零都人成化中進士累官廣東僉事在國學建言五事所指斥皆人難言者歷官有聲性剛正寡合謝事歸隱龍溪好學忘倦

丁 積

丁積寧都人成化中進士授新會知縣毀淫祠杜私謁綽有善政卒于官民爲立祠陳白沙哭之以詩云有廟旌遺愛無錢返故鄉

胡 易

胡易寧都人弘治初進士授給事中立朝敢言風采凜然所著有易經淵源學者宗之

卷之三
黃弘綱

黃弘綱字正之號洛村雩都人以詩經舉丙子鄉試第七人丁外艱往兄弘彝墮父貲不能償父怒將杖之綱憐焉自代三百金以解陽明先生聞而異之嘗謂士人曰黃君來何遲也旣小祥始上謁三日而悟心理合一之旨凡所誦說卽能無悖於先生先生之教士人也擇資之近者特置左右時掖弁頓挫而造就之知用力矣則又諄諄操習其誦說與已無悖士人初至者令先以意接引且察其性行何若俟漸領略徐共面語故已不勞而人易知綱首在造就中日

以接引得朋友益故從先生去虔至歸越不忍離者
四五六年戊子冬先生道卒門人倣築場義歲擇一人
紀其家綱居守二年久之思得一職自試甲辰授福
建汀州府推官執法明峻能聲漸著戊申召爲刑部
雲南清吏司主事又明年北虜入寇 皇上震怒邊
將多逮西曹或不盡法卽加責問畏罪者務深刻以
希旨綱直據法遣之不輕進退往往忤人以故讒者
四起辛亥當考察期例予謫調因上章請得原職致
仕報可旣歸士人有所請質瞪視注聽不遂舉似以
俟意盡衆論旣畢徐擇一二言諷之不競談以眩所

知意態含蓄未易涯涘然善啖喜浴曾不自異辛酉
五月二十八日卒其學且再變始者持守甚堅其後
以不致纖毫之力一順自然爲主至其生始終所
未少變大抵厚於自信而薄迎合長於持重而短機
械僉卒不憾可以鎮燥心瑣屑不入可以消靜見去
所謂不爲嬰兒之態而有大人之志者

何 秦

何秦字廷仁號善山零縣人爲諸生時同邑黃落
以所聞陽明之旨盡告之秦曰我昔恨不及白沙少
門意斯道不復有聞於後也由今所聞又奚他求哉

謂恐不利於舉業家貧親老柰何洛村曰嘗質之師
云道也藝在其中矣道猶根株藝特枝葉耳於是同
趨虔臺至則陽明提兵桶岡又相率趨南康執贊焉
是時秦有繼母之喪斬然以衰見陽明日是可謂不
學以言而學以躬也嘉靖壬午領鄉薦已而陽明在
南浦則左右于南浦在越則左右于越陽明既沒辛
丑始謁選爲令得新會喜曰茲非白沙先生之鄉耶
數十年夢寐今始及門至則掃祠宇召諸生爲期而
會設條而教久之環祠門而聽者踵相接也乙巳陞
工部主事辛亥卒

南安府

蔡原啓

蔡原啓上猶人洪武中由歲貢拜監察御史剛正有風裁

賴 禮

賴禮南安人永樂初進士第累官興寧沅江知縣廉介不阿所至有稱卒于任民哀思之

劉 永

劉永大庾人永樂末進士任刑部主事驛郎中才名甚著陞荊州知府興學勸農一郡翕然稱治以勤視

藩不法繫獄朝審直其言仍復職以憂去郡軍民幾千人走京師懇請特命奪情起復歷官十七年卒於任閩郡之民哭拜於門者日數百人立祠爲祀以志不忘云

蔣 誠

蔣誠大庾人永樂末進士授巴縣知縣牧愛得民去任祀于名宦祠擢監察御史風紀振肅陞廣西按察司副使威惠並行俱稱得體事親甚孝以仕終養鄉人賢之

蔣 銘

蔣銘大庾人宣德中進士授主事歷吏部郎中陞雲南澂江知府平生清介不屈所至人不忍欺比致仕尤以風節自持非公事足不入公門

張九達

張九達大庾人弘治中進士由揭陽令陞南京禮科給事中彈劾不避風采卓然累官湖廣參議士民戴之爲立碑起復改廣西有征蠻功卒于任追陞秩焉

劉節

劉節字介夫南安人生而穎異十六充郡庠生弘治辛酉元旦賦詩有筆掃萬夫之志督學邵寶得其文

嘆曰雄才可空冀北矧江右乎比鄉試侍御周公進
隆素負經學得節卷大愜服遂擢第一乙丑會試名
在第六及廷對敷陳剴切遂賓三甲授兵部武選
主事時逆瑾竊政偶忤時宰謫尹宿松宿松邑小事
劇民悍吏緣爲奸節發摘如神有假威肆齧者廉得
其實斃之杖下合境肅然勸農興學邑遂大治甫二
載晉守廣德癸酉晉四川提學僉事欲疏終養母止
之曰汝當育賢圖報勿以我而後君也汝昔赴考貽
我慮多矣按歷必母憚遠庶體我心乃往蜀申條約
正倫理首明關雎之義婚姻以時縉紳斐然向風歲

試諸生雖僻遠必至遵母教也少師石齋楊言諸朝
曰吾蜀董學得人矣丁丑晉雲南兵備副使己卯復
奉 命提學廣西癸未晉福建左叅政宅憂起復補
任河南督理糧餉丁亥晉浙江右布政使己丑冬晉
都察院右副都御史巡撫山東庚寅奉 勅總督江
淮漕運仍兼巡撫卽疏漕政五事巡撫五事復申議
政八事巡撫六事次第行之嘗奉 命祭告 祖陵
皇陵以祈繼嗣又疏舉人才特及泰州布衣王艮等
懇請裁革營倉內臣貂璫介胄寂不敢肆績最進階
資治尹廢子音國子生壬辰晉刑部右侍郎癸巳星

疏乞致仕 詔從其請年八十卒輯有廣文選周詩遺軼春秋列傳兩漢七朝文數聲律發蒙並行於世

黃養蒙

黃養蒙字存一南安人少而警敏凡書史入目輒不忘撰著一脫手輒不易嘉靖辛丑進士授遂昌尉邑前令爲豪猾所誣抵蒙廉其非辜白出之爲民均徭役民大稱便政暇則延諸生講論道腴孳孳無少倦擢吏部稽勲主事徧歷諸司累轉至考功郎中計吏之歲日夕居曹中一切杜私謁所旌別去存悉協興

論事竣遷南京太常寺少卿。晉光祿卿四十年。晉南京戶部右侍郎。踰二載調戶部。端慤重厚。雖容有雅度。南安故無城。戊午邑燬於寇。力贊夏尹汝礪築城之議。已而寇復至。邑賴以完。甘尹官議濬萬石陂。復悉湧之。二事爲邑百世利。皆成於蒙里人德之深。相率肖其像祀之。歿遂昌亦祀之。名宦祠。

鄭溥

鄭溥。南安人。由進士爲無錫令。無錫故名爲富。而多仕者爲令者。往往胺取殄用其財。而逆以機數。搆嫉上大夫。溥至按都鄙賦役之籍。資以諷訪。得其禮俗。

所由嘆嘆曰茲邑生迫而斂重若此乃謬以富得名
民方以媿侈遨佚招四方之目其奚以免因語民以
奢貽儉存設陳得失禁戒明白發於惇惻自以裁貶
一身服御爲率至其張具上官館遇過客交際士大
夫舉捐於舊度豐約之中使財僅足以成禮而不爲
浮尤吝興作舍館舟輿苟有可因不妄變革曰勞民
以悅人非吾心也既不匱財以傷民心始稍取境內
一二巨室橫放難諭者重寘之法以示威曰如是足
以致刑矣一與民相安爲寬平暇則與士大夫相賓
接驩不失節士大夫憚以私濫聽退勑其家亦莫敢

有撓也客或見坐縣堂從容不苛庭中常空異於東西行過縣所見怪胡能然溥曰惟不擾人以自累耳秩滿陞南京戶部主事維揚置分司榷舟有大小二關舊皆征之溥往司榷謂某府史曰征利而爲是鍼細髮密雖取羸胡足貴通其小關恣舟行莫誰何之榷計以足乃知諸爲細密者非專爲國增計也積資員外郎中擢雲南府知府未赴任以父喪歸喪免侍母不忍去左右居歲餘母病卒服除赴鈴旅卒都下年五十六

本朝分省人物考目錄卷之七十

福建福州府

吳海

鄭旭

趙明

陳申

王褒

王恭

林碩

林誌

陳景著

鄭闡

林鈍

鄭珞

林元美

陳暉

陳叔剛

吳復

薩 琦 翁 瑛

趙 榮 陳 琉

謝士元 林 漣

林庭梯 林 庭機

陳 紀 林 半

鄭善夫 林 蘸

黃季瑞 林 倍春

鄭 懷 鍾耆德

羅 泰 龔用卿

蘇夢暘

補遺

孟玘

邵銅

葉奇

林鉞

本朝分省人物考卷之七十

南直督學御史西浙過庭訓纂集

門人蘇松備兵副使南郡熊 膏參閱

男 過銘盤

過銘盂

懷遠訓導武陵胡應魁

寧國府學生員嚴弘志

句容縣學生員劉孔陽金訂正

福建福州府

一

吳海

吳海字朝宗號魯齋閩縣人在元季以學行著稱時四方繹騷所在盜賊紛起遂絕意仕進深自韜匿間與同志者講說經義賡相唱酬一時名人如貢師泰王翰林泉輩皆重其人深敬畏之國初部使者欲薦于朝有司轉相推轂海力辭不就闢一室於家園隙地醉經枕史娛適其中因採摭古人孝子順孫節婦烈女及兄弟之相友娣姒之相宜者附以感應禍福各爲一卷以傳布閭巷令小生穉女誦而習之名曰命本錄謂克培其本則司命者皆無權也又著書

論楊墨佛老爲六經之賊管商申韓爲治道之賊遺事外傳爲史氏之賊文詞蔓說爲文章之賊謂上之人亟宜取其書而禁絕之使天下曉然知正道之當趨岐徑之當塞名曰書禍平居喜聞過或有告之者立改其失因扁其延賓之所曰聞過軒常慕鄒魯士風之淳厚屢欲徙居而不克因以魯齋自號志所願學也其爲文嚴整雅與咸有矩程而一歸諸理後學咸宗仰之有聞過齋集行于世

鄭 旭

鄭旭字景初閩縣人洪武中以學行薦爲國子掌儀

上幸太學親選才行兼備者十人以傳東宮旭名第二後以蜚語謫吏滇南至二十餘年復以經明行修被薦詔起南安縣學訓導嚴立課程勤于督誨未幾卒士子無不慟哀悼惜者旭居家孝友與人交篤于信義一時名士如王偁林誌特相友善其學主以五經旁獵子史所著有初學提綱咏竹稿藏于家

趙 明

趙明字景純閩縣人洪武中由國子生拜雲南道監察御史與同列七人俱忤旨處以大辟明獨以狀貌英偉特赦爲編氓三十一年以薦授閩清縣學訓

導永樂初擢知上饒縣乞仍舊職以便養親不許既抵任悉心民事正風俗革吏弊均賦役審權量息盜賊治聲茂著在官幾三載日惟二食及卒衣笥中餘白金僅一兩邑人哀之如失父母相與立祠祀焉

陳申

陳申字孟膚閩縣人博學善文詞與林鴻鄭定諸名士相友善洪武間以薦爲衢州教授尋擢潮州知府有惠政人稱爲文章太守號籽齋

王褒

王褒字中美閩縣人博極羣書少有詩名洪武中以

明經貢入成均頃之擢舉應天選歷瑞州長沙兩郡
博士遷永豐尹褒治永豐課農桑興儒學縣無逋事
永樂初年朝京師考上最已而以文學表修 高廟
實錄遂擢爲翰林修撰及修永樂大典勅克總裁官
褒性剛正居家以孝友聞與人交敬久而不衰人有
善汲汲然獎進之閩志列在儒行傳中有集若干卷

王恭

王恭字安中閩縣人也瓊閩皆山而恭家故貧則爲
樵往來羣山中自稱曰皆山樵者恭善爲詩援筆纏
韻千言立就 文皇帝四年有司以儒士薦強起至

京師年六十餘老矣，勅修永樂大典同郡王偁爲翰林檢討同纂修戲謂恭曰君無以會稽章綬故來耶恭從容笑謝曰吾山中斧柯幸自無恙君無深誚我爲矣居三年大典成試詩高第授翰林典籍居頃之投牒歸著詩數十卷號曰白雲樵唱其在金陵曰鳳臺清嘯歸田日草澤狂歌軼不盡傳廬陵解縉稱其布衣蕭然不慕寵榮強之而起朝陽鳳鳴此足以見恭矣

林 碩

林碩字懋弘閩縣人永樂十年進士拜監察御史宣

德初奉命按浙江擊楫埋輪毅然負澄清之志尋遷
兩浙按察使時有中貴人裴可烈督運于浙湯千戶
者賄結之倚其勢橫郡邑間碩稍繩以法中貴人怒
訴於 上誣碩格詔出誹謗語逮至闕下碩叩頭言
臣前爲御史官七品今超遷按察使三品臣惟恐不
能報 上恩臣實無誹謗語緣臣前巡按浙江人多
有不便者今但欲去臣自便耳 上爲愀然動容曰
朕固未信是以面問汝耳卽命釋之復其官而降勅
切責可烈碩忤左右處雷霆之下卒能自直士論壯
焉在浙久人懷其惠終廣東左布政

林 誌

林誌字尚默閩縣人年十四從王偁學日記數千言
永樂中鄉試會試皆第一進士第二授翰林院編修
與修性理大全諸書累遷右春坊右諭德兼侍講宣
德初復與修 太宗仁宗兩朝實錄未幾卒誌爲人
簡靜不苟交與居官十有五年恭勤趨事自奉淡然
其學於經史諸子及天經地志醫卜之說靡不通曉
爲文章簡奧不蹈襲舊說詩有盛唐風所著有易集
說及蔀齋集行于世

陳景著

陳景著閩縣人永樂中進士第三授翰林院編修與
修五經四書性理大全書成以母老乞祿便養改福
州府教授生徒多所造就

鄭 閻

鄭闐字公望閩縣人永樂中登進士第自乞典學校
遂授安陸州學正改無爲州遷廣信府學教授所至
師道尊嚴作人最多致仕卒闐性質直剛毅嫉惡不
少假借居官三十年囊無餘貲其學精於禮記旁及
子史醫歷之書時與林誌齊名有抑齋集

林 鈍

林鈍字叔魯閩縣人永樂中領鄉薦會試乙榜授常山縣儒學訓導常山科第久乏鈍嚴立教條常勤訓督終其任登賢書者凡八人遷寧國縣儒學教諭亦多所造就嘗典湖廣江西文衡其在湖廣時有士子餽之金求預薦書者鈍白於有司正其罪及卒長山興國二縣志皆著其賢三子曰清源曰泮曰濬淵俱登進士第遂以清源恩贈工部主事所著有說鈴餘響等集藏于家

鄭 珑

鄭瑒字希玉閩縣人永樂中舉進士入翰林爲庶吉

士授刑部主事宣德中擢寧波知府中官裴可烈以公事至郡貪暴不法民被其驟擾瑣上其罪狀詔寘可烈於法未幾丁內艱歸適海寇爲患郡民千餘人上疏乞留 詔奪情起之瑣辭不允旣復任黜賦吏抑豪強令行禁止發奸摘伏治績爲兩浙最滿秩陞浙江布政司左參政未上卒于家

林元美

林元美名鏐以字行閩縣人永樂中登進士第宣德中授上猶知縣邑土田磽瘠民貧無以供賦稅多逋他境元美請于 朝核其無田及有田而汚萊者悉

燭之邑人舊鮮知學元美政暇輒集庠序弟子員親爲講經科第始不乏人山峽中有盜時出剽掠元美撫以恩信後皆向化正統中擢寧海知州州置兩衛武職習爲民害元美密條其不法以聞下臺憲繩之其害遂戢有二僧至境以術惑衆執而訊之乃他郡越獄盜也人以爲神值歲旱蝗躬巡歷賑恤復奏減其賦天順初授撫州知府年六十致仕成化初詔進階亞中大夫卒後以子瀚恩加贈中議大夫

陳 謐

陳暉閩縣人永樂乙未進士授貴州按察司僉事政

績茂著尋陞廣西按察副使引年致仕學識高遠尤
善草書得懷素之妙號存菴

陳叔剛

陳叔剛名樅以字行閩縣人永樂中登進士第宣德
初拜監察御史嚴重不苟預修 太宗仁宗實錄遷
翰林修撰未幾丁內艱廬於墓側哀毀逾禮服除修
宣宗實錄克經筵講官尋陞侍讀以父病乞歸省卒
叔剛性溫雅忠厚以文行推重於時有絅齋集弟叔
紹正統中進士拜監察御史當景泰初 朝廷多故
臺端凡有所建白彈擊皆叔紹爲之倡陞湖廣按察

副使嘗奉命同刑部郎中許振審錄冤獄多所平反卒叔紹有孝行母病至嘗糞驗差創有毅齋藁子
燉天順中進士亦拜監察御史累陞江西右布政使遷浙江左布政使命下卒燉歷官所至皆有聲

吳復

吳復閩縣人由知印授大明府豐濟倉大使正統丙辰以薦者擢知吳縣有治績陞工部主事累官通政司右通政尋遷工部右侍郎天順甲申乞致仕歸卒復蒞官淳厚明敏綽著能聲

薩琦

薩琦閩縣人宣德中進士改翰林庶吉士爲人耿介持正學有源委授翰林編修預修仁宗實錄後陞禮部右侍郎兼詹事府少詹事卒于官

翁瑛

翁瑛福州人自幼聰敏喜學甫四歲祖教以古詩卽成誦不忘祖卒哭踊如成人十三受業郡庠日夜不懈未幾父坐事逮詣福州稟憂之請從教授不可瑛懷不能已竟侍行維持調護得無恙而歸教授終謂其忤已坐以違學規黜之瑛乃之京以其情訴於上得復就學志益勵學益進爲文益有名丁酉以詩

經薦于鄉明年入太學六館之士讓其能洪熙乙巳
以天下教官多缺選諸生之有禮行者補之得仁化
教諭仁化僻下邑學久廢瑛以興起自任廟像廊廡
講堂齋舍庖廩器用以次繕完日進諸生講學其中
而以身先之諸生亦日就規矩厥績用著丁未隣家
失火勢將及學舍時東北風急瑛稽額顧天俄風返
火熄得不焚戊申遭外艱歸卜葬於石廊山山多虎
且陰雨浹旬人無所用力瑛患之號泣禱于天明日
雨止虎亦斂跡人謂孝感所致壬子典教桐鄉桐鄉
新置縣未有廟學瑛度地鳩材始作之癸丑以內艱

歸正統丙辰陞國子助教循循善誘得師之道甲子
上視學謁先聖退坐彝倫堂祭酒司業各以經進講
博士助教以下皆侍 上嘉悅獎勵明日入謝各賜
衣一襲錫宴于 奉天門瑛雍容進退動中禮度四
月陞翰林檢討仍掌助教事

趙 榮

趙榮字益仁陝西華昌府通渭縣籍福州府閩縣人
正統中以楷書生員授中書舍人直文淵閣素有膽
略遇難不避正統十四年八月土木之變 英廟北
狩 景帝嗣位尊爲 太上皇十月初虜首也先入

寇遣使言欲和時虜情叵測選使虜者多規避不敢行榮毅然請往大學士高穀嘉榮之勇奮卽解所束金帶與之十八日陞榮鴻臚寺卿同右通政王復持羊酒往也先及其弟伯顏帖木兒擐甲冑屬弓矢引榮同復等前露刃夾之謂榮等是小官索大臣于謙王直胡濶石亨等出迎榮同復辭歸 太上諭二人曰彼無善意汝等宜急去二人方回而虜騎恣行標掠會四面援兵漸集虜夜遁榮還仍入文淵閣景泰元年六月也先以屢使議和不確俾其知樞密院阿刺爲書遣其叅政完者脫歡等來又議遣右都御史

楊善爲正使榮爲副使榮卽就道不辭陞工部右侍
同虜使下番議和善等使虜不持一繒以口舌曉譬
國威不屈遂得回鑾衆謂是行也楊善忠義發於言
詞應對不窮有以陰折窺惡實爲功首而榮奉侍之
勇其氣亦足尚云還京轉工部左侍郎 英廟復辟
進榮工部尚書時文臣盡行貶斥榮以使虜受知于
上雖石亨曹吉祥表裏擅權爲奸榮朴實知義不入
其黨五年曹欽謀不軌犯闕殺都御史寇深錦衣衛
指揮使逮果榮披甲躍馬呼於市曰曹家是亂臣賊
子當共剿殺我輩是忠義臣子不可退避於是從者

數百人同孫懷寧鏜提兵襲欽於陣前獎勵士卒以滅賊須臾事定以功命兼支大理寺卿俸一日英廟與大學士李賢從容議六部尚書得失吏部王翹老矣戶部年富不易得禮石瑞稍弱刑部陸瑜甚佳都御史李賓亦佳工部趙榮亦能辦事賢曰此人可取且如曹賊反時文職皆畏縮逃避況兵非已責誰肯出前惟榮自奮呼衆滅賊成功如此存心行事人莫能及上曰是亦忠臣七年卒於官廕一子錦衣衛指揮僉事

陳 瑋

陳瑋閩縣人由進士拜監察御史彈劾不避爲權貴所忌嘗督兩京學校時稱得人尋陞江西副使按察使威望大著進布政使卒瑋操履清平學亦該博宦轍所至一以表名賢正風俗爲首務焉

謝士元

謝士元字仲仁閩縣人景泰甲戌進士授戶部雲南司主事上疏陳四弊爲尚書年公富所器許事有涉中官者力抗不少假貸中貴不勝忿求其事竟無所不得擢建昌知府有兵盜民財夜數發兵官庇其跡法不得施元以危言恐兵官皆奪氣奸始息乃新學宮

下禮器行射法購書以惠來學又建祠以祀李觀表
賈孝子譚節婦之門以勵鄉俗爲敦化表忠勸學二
圖繫以詩俾民誦習知所嚮慕尤惡邪術南城民以
腐鼠蒙一石像置屋上鴉聚而啄之民陽驚取之以
爲神趨者蠶集公碎其石於庭乃止復有女巫憑鬼
物言禍福公欲究之巫忽自言吾畏謝公吾去矣遂
如常時有持券訟田者遙叱之曰此僞耳僚佐問何
以知之笑曰券紙今式其所訟乃二紀前事也訟者
輸服歲再饑捐俸金爲倡富民爭開廩延糴民賴以
濟成化間南京大理寺卿夏公時正巡江西守旌於

朝及滿九載民詣
闕請畱陞從二品俸仍知府事
諸生立生祠元撤祠毀其碑後乃復立以憂去服闋
改知廣信永豐有銀冶久閼處州民常盜發動以百
計元勒兵循靈山以東趨之賊陽遁畱二三人爲餌
邏者見而射之亟止之不及伏四起刺傷左股累創
出戰得其賊首俘殺甚衆塞治穴而還改知永平復
以憂不赴服闋擢四川右叅政東鄉盜藪有司莫敢
制元捕殺數百人或議移縣曰盜不懼遠畏有禦耳
乃檄縣吏修城隍以土兵戍之後亦無變建始有頑
民挾官府爲害餘五十年廉得其魁窮治之其黨盡

散元治狀益著用廷薦擢右副都御史巡撫其地
民代輸邊儲者多爲姦弊遣吏覈實得逋米十三萬
石有奇嘗大祲民流入藩郡日不絕乃爲廣室十餘
區作糜食之所活不可勝計弘治庚戌上京師以疾
乞致仕時六十有七又三年而卒居官兩迎父養從
父病親爲嘗藥族黨婚葬不舉者必周之建祠堂示
田綜理家政暇則玩易賦詩至老不倦所著有約齋
稿若干卷咏史近體三百首

林 潤

林瀚字亨甫閩縣人成化丙戌進士改庶吉士授翰

林院編修纂修續通鑑綱目成陞修撰進左春坊左諭德弘治三年太宰王恕薦瀚學行淳正陞國子祭酒上疏請開科貢以進人才下禮部議 詔令開貢九年陞禮部右侍郎仍掌監事在國子學垂十年待諸生嚴而有恩凡差撥歷事定立條規雖勢家子弟請託越次故事祭酒膳役銀歲以百數計悉貯之官構祭酒公署一所各監師儒入廨悉備實構創十二年陞吏部右侍郎尋轉左與太宰同心掄才務求至公十三年陞南京吏部尚書鎮定不搖人倚爲重會災異率羣僚陳十二事有御史自巡按歸逮獄二

三儒生黃緣傳奉授中書翰上疏言御史宜俯垂寬
宥以全風憲之職中書宜收回成命以杜倖進之
門疏入忤旨上疏自劾不報十六年復疏重根本
以回天變四事曰保固南京以重祖宗之根本佑
殷皇儲以重天下之根本撫綏百姓以重邦家之
根本增進賢才以重致治之根本識者服其有裕國
遠猷且剴切時弊正德改元時冢宰缺人臺省交章
薦其學優才贍廉介剛方宜居此位未幾改南京兵
部尚書叅贊機務因災異會陳十一事雖集衆論之
長而裁製多出其筆言皆剴切士論健之然權姦自

是側目矣二年逆瑾亂政素嫉其正直值南京科道官言事被逮獨往送贐以俸金且議上章直之瑾聞愈術之勒令科道招詞連瀚同黨乃矯 詔降浙江右叅政致仕聞命卽行怡然自得後瑾復矯 詔指與大學士劉健謝遷尚書劉大夏等爲朋黨頒示天下瑾伏誅御史凌相等交章謂瀚德尊望重有經濟之宏規不宜置散地 詔復尚書仍致仕卒贈太子太保謚文安瀚學問淵委識邃而養充休休焉至方若員至勇若怯溫燠若可親而中栗不可柔子廷楨官至太子太保工部尚書廷機官至禮部尚書孫炫

進士官通政司叅議煬進士官知府嫌官至禮部尚書煙進士官知府俱有聲人以爲德厚之報云

林庭錫

林庭錫字利瞻號小泉瀚之子閩縣人弘治己未會試第五人主司宮保吳一鵬司空趙璜稱曰天下士也廷試二甲第二人授兵部武庫司主事規條周密大司馬馬文升亟加稱許調職方查錄戎冊於南京轉員外郎陞武庫郎中劉大夏許進相繼爲司馬亦皆器重之時孝宗勵精圖治任用老成方屬意于大夏釐革庶政凡閭里踐更勇士冒濫之弊大夏悉

委榔查理乃剔奸蠹刻僞慝不畏強禦人皆稱便正
德戊辰同考會試所舉士如今松石劉天和端石江
曉可泉胡纘宗皆有時名調職方職掌天下戎務每
邊警報至立削案稿動協機宜二三鉅公不能爲同
異推用武將尤極詳審一以公道行之及曹元爲司
馬故善逆瑾部事率意更張榔持正不阿會張綵爲
吏部尚書陽收名士以掩陰附瑾之跡先諭意于榔
欲用爲御史榔力辭不能辭以是憾榔陞知蘇州府
蘇東南劇郡財賦甲諸省且當要路政務外酬應人
事無虛晷榔至晝夜忘倦搜摘隱伏裁節冗濫至於

交際士夫引接賓客雖當疲極亦無惰容庚午辛未
七邑大水爲患棉抗疏言民窮苦之狀乞停織造罷
繁征請鈔開之稅以備賑濟疏入戶部難之再疏始
報可民賴以濟擢雲南叅政雲南夷徼下車遍歷荒
邑治以不擾夷情自安景東諸郡積逋數十年棉知
其力困乃令各長官司許雜輸牛馬布帛卽以給武
職久缺之俸遠近咸以爲便土官爭立互相讐殺棉
徐以一言斷之罔不帖服甲戌子炫登進士棉奉表
入賀 萬壽禮成疏請終養 武宗許暫回省抵家
復上疏曰臣父衰病日侵聞臣將行輒增憂歎臣若

勉強就道倘以念臣之故憂病不虞則臣身蹈不孝
將焉用之奉 吉林瀚歷事累朝名節無玷今旣年
高有疾林庭槐暫准在家侍養仍着有司時加存問
時炫亦以禮部主事謁告還籍己卯瀚卒服闋補江
西叅政陞湖廣右布政使隨轉左嘉靖乙酉冬入覲
銓曹考天下藩臬治行第一丁亥陞都察院右副都
御史巡撫保定等處蒞政卽疏革抽分內臣清查驛
傳汎濫議處軍民數事已罷歸己丑陞南京兵部右
侍郎與司馬王廷相寅恭協政凡中貴貢獻多索船
每載抑其數且疏聞著爲令快船甲累及戎伍立

爲畫一之規科害不得肆壬辰夏考績入爲工部右侍郎遂署部事值彗星見條四事以聞且勸上身先儉約以率天下時上銳意復古又營建之事有裨于禮樂者奮然爲之疏上亦蒙嘉納後因災傷疏乞取回採木燒造等官五員內府歲用銅鐵器皿請立法五年一修十年一造省民財數十萬兩乙未夏遼東軍士擾亂廷推往勘兼僉都御史榻慷慨以行條上四事俱經國重務上皆允行未幾擢本部尚書時營建九廟七陵諸工役繼作費以億萬萬計榻晝夜焦勞隨宜區畫務求事集而民不擾丙申春

上召諸大臣議謁天壽山諸陵且駕出倉卒諸供應
立辦槩授僚屬之能者凡道路橋梁行幄器用二三
日輒治方壽宮將建上自擇吉壤于陽翠嶺及周
視諸陵明樓香殿槩皆侍行夏太廟捧主東宗廟
工完加太子太保賜銀綺有加辭免加官不允又奉
命之康陵啟莊肅皇后皇堂祔葬次丁酉夏值天
變詔求直言因懇疏乞休得旨戊戌慈寧宮成

上念槩舊勞頒賜銀幣已亥春冊立皇太子槩表
啟稱賀上有具悉忠愛朕心嘉悅之諭庚子八月
炫以禮部精膳郎中起用不忍離槩促之曰吾老矣

圖報在汝其亟治裝以行辛丑八月三日卒年七十
正德初同郡許給事天錫同僚黃主事昭皆以忤逆
瑾受害黨禁方嚴棉周旋其間不顧利害人以危難
告者必委曲爲之處其治郡時縣令鄧文璧被誣力
直其冤乃得免富家子朱慶繫冤獄十八年廉其誣
出之同列諷以避嫌曰吾知其枉也而不爲直之安
忍乎所著有小泉錄稿小泉奏議目錄有交際禮志
鱗鴻集延賓紀藏于家

林廷機

林廷機字利仁號肖泉瀚季子幼而敦敏年二十舉

于鄉三十成進士遇 肅皇帝臨軒選入讀中秘書
授檢討預修大明會典克甲辰春秋同考官已而遷
國子司業遷南京祭酒遷太常卿遷工部改禮侍遷
工書改禮書以致仕去平生渾樸簡重澹然寡嗜慾
當在史局時伯子燦亦舉進士官檢討而邸第聯分
宜相未嘗一私謁或風之不動及爲司成不數月移
奉常陽尊而陰抑之出分宜意機視之蔑如今制史
官鮮煩以刑名錢穀水衡之事機兩任司空無倦色
居畱都十有三載以考績三入京師會 穆宗初基
改秩宗而機從歸途乞骸骨如鴻翔鳳舉不復可籠

狎矣先是振武營軍變戕殺少司空于橐街人心洶
汹銓部舉戶篆屬機機一鎮以靜不爲隄防衆亦寧
帖諸郡國轉粟鬻儲屬邑不至則不遣每苦稽滯機
勅所司令諸邑毋相及事竣卽遣四方便之京倉近
水者易輸運爭事請託至露積亢溢于外而遠者或
銖粒不入守空庾機立籌手自探之得徧及諸主吏
感泣曰微是吾屬餒死矣內府歲供器皿及織造

御服費鉅萬計機稍裁其濫溢中貴人斂手不敢爭
工曹之榷稅蕪關者多鬪葺弊滋甚機請擇才望給
符檄郡邑廉辦吏爲主進歲增額二萬餘益胸次光

潔信理而行無瞻顧拘牽之態其績効反出才臣上
顧世莫能盡知也旣請老蕭然如寒士未幾伯子燦
繼爲宗伯會丁內艱謝不起機奉詔進階資德大夫
正治上卿伯子累疽卒仲子煙因亟解組還侍甫數
月而機卒年七十六有巨星隕于郊姚江孫文恪嘗
曰不忮不求惟吾友爲然莆田康司空同在史局額
其齋居曰學林其爲賢者所崇仰如是所著有世翰
堂稿藏于家金陵許符卿論序甚悉大抵其文簡質
而該涵春容大雅與近世蹊徑絕異詩逼盛唐不爲
鈞棘凌駕而典則雄渾趣自深長

陳紀

陳紀字叔振閩縣人成化五年進士改翰林院庶吉士授監察御史提督北直學校士子服其公明久之以都御史屠浦薦擢陝西按察使有囚淹禁十餘年不決者辯而釋之擢都察院右僉都御史巡撫宣府未幾召還理院事陞副都御史以疾告歸卒賜祭葬如例居官清慎持法平恕人多敬之

林泮

林泮字用養閩縣人成化八年進士任南大理評事歷廣州知府廣西右叅政江西左右布政順天府尹

戶部右侍郎提督京儲正德三年陞南京戶部尚書尋有旨勒令致仕時逆瑾方橫諸大臣不附已者多從中罷甚或繩之以法在廷惴惴泮得致仕免於禍以爲幸甚未幾坐累罰輸邊米百石貧無償甚苦之泮所居燬于火不能復創及歸無所處寓僧寺及先賢書院者數年至是卒無以爲殮有司爲庀喪具且悉其廉貧之狀以聞乃得賜祭葬如制泮居官小心畏慎事上或過於恭然事亦不爲之撓至于廉潔之操終始不渝尤爲士大夫所重議者惜其才略無大過人然清修自矢可以方之古人而無愧矣

鄭善夫

鄭善夫字繼之閩縣人嘗誦曰墜道非時彥萎儒與世靡視古太峻脆志以降其趨吾固疾學之不變懇學十年力反之古弘治乙丑年二十一第進士正德改元纂修蘇松常鎮實錄成內外艱服闋改戶部主事出理滸墅關商人利之武皇馭極柄屬中官善夫喟然歎曰大丈夫當龍潛於世退見無骯枉我志力告得請乃築少谷草堂於金鼈峰作遲清亭俟天下之清交與鮮絕巖居六載正德十三年有司勸駕兩臺疏薦改禮部祠祭司主事十四年轉員外郎三

載考績宗伯咸賢其能秩相也三月武皇將南
謀諸寮采曰駕未發諫之可止否則如股肱何勸
兵刑諸曹郎中黃鞏等若干人同伏跪於闕門疏願
切指斥嬖臣江彬及中官鞏濁亂天下怒犯
杖之闕下死者貶者落籍于民者有差旣南狩善士
切告未得明年歸遂過浙山人孫一元太初死走
場山中哭之治喪事畢游越山水至逾八月旋閩豆
湖上多病若病少間必往佳山水游賞竟日嘗以筆
人曰江南山水異受吾杖履嘉靖改元都御史周
史汪薦起爲南京刑部郎中尋轉吏部驗封司病卒

發笥寢寢鄉人始駭善夫之貧賢善夫之能其官嗟
夫財利者世學皆旨嗜之俗殉痼厚至居官必得財
有道者且惑況鄉人旃旃仁義何以破愚頑牖昏庸
如善夫者能居道也矣善夫婚嫁七弟妹貲業皆其
推與孀者贍之田令以完娶節葬母屬二十二人其
治身嚴厚冲澹高潔

林 輔

林輔字質夫號石峰少雅愛靜修嘗閉處一室端默
誦習飲食不關其家人者三年故其學精通經傳子
史旁及訓詁韻切篆籀諸書至於軒素醫家術靡不

探析性孝友居父母喪哀毀蔬粥三年跬步未嘗遠
几筵事其二兄甚謹中正德丁丑進士明年授大理
寺左評事僅數月廷中稱平又明年武宗南巡詔
下先日廷臣諫者竟以不勝卒體素羸時寓公署旁所
杖倍於先諫者竟以不勝卒體素羸時寓公署旁所
與一奴俱奴且疾既杖昇歸以公署不宜殯殯於同
鄉鄭秋官源渙所秋官時亦被杖爲力疾治喪事哀
之者曰忠臣忠臣卒後二年世宗卽位祭贈錄詹
祀鄉賢祠黼閩縣人

黃季瑞

黃季瑞閩縣人嘉靖丁未進士出知南海時邑令久曠百廢廢圮季季瑞始至慨然振刷定立品式便民征輸又清滯獄擒積惡驅久役從教化表貞節立義塚大修堂廡吏舍之傾欹者以肅防維皆捐俸爲之民不告勞未幾以治行最內召去邑人至今誦之不衰

林偕春

林偕春字孚元號警庸乙丑進士選翰林院庶吉士故事閩中館選二人惟一人畱是科春與莆田陳尚書經邦俱授史職春爲檢討戊午分校禮闈明年以告還又明年還職萬曆癸酉同修 肅穆二朝實錄

性嗜書好學及官詞曹每請俸輒送書肆杜門息交游沐文枕該習朝典意尚深遠人莫之測也爲人直躬曠宇腸如絃繩外甚宏肆而神守堅確其當制也以次草江陵誥詞據體演文無所誇飾江陵固已不怡屬令改定之又持曰王言適如是止也不增易一字遂大憾之乙亥用年例改湖廣按察司副使行至淮安上章請罷報可先是門人習孔教以書勸之官至是報曰僕賦性過慙誤塵華貫適者外轉勢固宜然僕豈敢擇官而後處哉士皆有志貴能自適古人有辭萬鍾而不顧者豈直爲高哉亦必有不安於心

者僕釋屬以來蓋非一日長短之效昭然可見今當
塗者以此處僕以我爲能乎否乎旣不以不肖爲能
而又不欲顯然斥之直以庸常處我我又庸常自待
耳靡寸祿是真無意於天下事者也天下事豈循常
局促舍已從人者所能成哉窮巷屏居門無車馬高
堂菽水良用快心祖母年已近邁恃人而行金石難
期喜懼交併朝夕奉侍亦足報劉暇時與一二弟姪
課文發其憤悱糾其紕繆輒然共適不待遠朋知我
者希則我者貴安能貶胸中之奇偶徇他人之面目
乎及江陵敗錄其素所廢斥者起浙江提學副使以

親命強行裁鑒精妙請寄無所受代春者晉江蘇濬
至今兩浙言良督學稱林蘇蘇公敏絕一世名爲知
人至取神骨物色之表不能及也骯髒不能細謹而
部使嚴重他藩牧事之皆謬恭視春澗疏意不能容
疏論之奉 旨調用詔下時方校閱越士越士追送
江上人人涕下不能仰視旣歸隱操彌勵復不得已
奉父北行以避仇父旅於姑孰而春行詣闕候補鞭
馬鄣南意不自得同年顧養謙開府遼東致書以酒
德爲言春戲報曰昔人喻酒於兵兵可千日不用不
可一日不備酒可千日不飲不可一飲不醉美哉此

言可與論酒矣第落落無成正可尋樂于酒而脾氣虛弱溏泄爲災欲效鄭公一飲三百杯竟不可得安得使酒哉乃知器自有限此祿亦不易也顧公飲中友故相往復如此無何以原官飭兵贛州贛方興峯岡之師春檄上撫臺力言用兵妄殺非是時已成師不及止然以春言獲原縱者猶數百人丁亥遷湖廣布政司右參政治承天時大旱春禱救甚勤居五月復坐言者罷歸更號曰雲山居士晚歲頗好內典及丁父艱肆力形家之言或勸之著書輒對曰三蘇文章今人猶厭讀我復何有乎嘗與人論爲文之法以

氣爲主其言曰意至而藻生神來而言暢行於所當行止於所不可不止老無子後舉子數歲而殤不勝悲咤遂有血疾疾時令人奏管絃倚而欹枕聽之亟問以後事皆不言獨引聲歌劉長卿上陽宮詩聲若金石兩手交舞其達生知命如此至行貞白貲產不及中人里居有司例供輿皂皆謝却之宅憂日寢興聖室中三年未嘗內也會稽陶望齡爲諸生時客游燕不及試事與其曹百人補試睦州春發牘首齡次仁和張鷄鳴仍檄以冠其先所試諸士子廩食於是庠士大譙爭言以父故私之春初不知望齡誰氏

予也聞謗撫心而歎愈益誦言兩浙士有先望齡舉者吾不復相文後名第相符始歎其神識春閩縣人

鄭 懷

鄭愷閩縣人號心遠博學善詞章其文深雅自成一家詩歌馳騁古今頗似金華吳立夫步驟有集藏于家

鍾耆德

鍾耆德字元長閩縣人少好學孝友出於天性家貧不娶教授生徒以養親晚年經至正之亂舊業蕩盡每以甘旨不克爲恨親沒哀毀幾滅性與二弟順德

明德處怡怡如也其先本鄭姓耆德承父命每以爲鍾氏求同姓立後而已乃歸宗以力不待乃作紀源錄以示其後人耆德清修苦節其學博極羣書其詩文渾雄嚴整所著有自省錄養正集等書明德字叔遠清詞懿行與兄齊名

羅泰

羅泰字宗讓閩縣人性穎異經傳子史無不涉獵尤邃於易春秋一時鄉之後進以二經登高第者多出其門弟澤舉進士二子紋繹俱領鄉薦皆其所教也暇復與同邑林誌輩相倡率爲古文詩尤工有覺非

集行于世

龔用卿

龔用卿字鳴治號雲岡閩縣人嘉靖丙戌第一人除授翰林院修撰戊戌擢左春坊右諭德明年上冊東宮兼官翰林院侍讀直經筵每進講志存規諷詔修明倫大典大明會典卿預焉書成兩荷金幣之賜己丑壬辰戊戌克會試同考官庚子主試南畿並稱得士丙申奉詔使朝鮮賜一品服至則宣揚國恩力卻餽贐遠人欽服復命疏陳三事上嘉納辛丑擢南京國子監祭酒增修學舍申飭監規一時士習不

變尋以病乞歸既抵家卜地獨山之原構爲別墅疏池藝圃雜時花木日與知友觴詠其中柱史曾佩趙福避居建安者久之未幾以微疾終年六十四生平孝友與客談終日不倦歷官侍從蔚有文名在告不通權貴書家食二十年竟置閑散士論惜之所著有使朝鮮錄雲岡選稿詩餘若干卷

蘇夢暘

蘇夢暘閩縣人歲丙午司南都官獄日戢獄卒不使患者諸囚又恐其夜霍之則監置一鐸今日有霍囚者同監鳴此不鳴者與同罪由是獄中肅然郎中沈

琬嘗指獄戶語曰此故生地獄也蘇司獄去吾不敢
繫人矣舊時囚有死而莫爲收葬者率置竈中羣犬
恣食之夢暘惻然適料囚米有餘卽白視獄諸曹郎
預爲樽以待死者諸曹郎大是之相率白中丞丁賓
賓時視秋官篆聞之喜益發衣帑諸物令夢暘給施
諸囚未幾轉粵東守禦吏目賓太息曰吾署司寇惟
有王郎中紹先及蘇司獄耳惜也紹先死而司獄又
遠遷於是特獎夢暘而資遺之甚厚王郎中何如人
是萬曆十九年所舉天下清苦以風百僚者夢暘年
三十餘未有子以司獄奉薄不擣家其爲吏目亦然

補遺

孟 玊

孟 玊 字廷振 號靜齋 閩縣人 正統己未進士歷戶禮
主事有風力名戊辰鄧茂七寇沙尤蹂閩之下上屠
戮如刈草管我師失利勢益張 玊陳攻守至計集三
省之兵屯潮陽屯江山大兵出鉛山跋延平諸路並
應筈魚置兔誰則逃之朝用其議命將出師己巳六
月神機之兵扼順昌俘茂七以獻沙寇平上杭銀治
疲人釁盜所輸復不當歲費 玊言當塞竟塞易儲之
議 章郎中綸鍾御史同爭之同杖死綸死復蘇幽之

獄犯繼二人後等之愈力因旱極上言群臣當朝謁
南內忤旨知萊州又知廬州治本古意宣化流而
郡幾無事平生述作爲盛山房類稿其什一存者也

邵銅

邵銅字振齊閩縣人景泰五年進士除廣東道御史
天順初劾曹吉祥石亨下獄謫壽光知縣調博羅縣
以勦寇功陞溫州府知府致仕

王鼎

王鼎字器之福州府人成化十七年進士令上饒明
斷有聲中貴人取水晶凌歛郡縣得於燒稍畿內艱

晚樂陵縣人。成化甲辰進士。官刑部員外郎。有清才。善用
者會臺省勅之親藩訛詆守臣會論免守于罪。陞光
祿少卿。晉大理左丞。歷右卿。轉左侍郎。逆瑾意。謫保昌
知縣。歷河南僉事。瑾誅。擢左副都御史。掌院事。累疏
乞休。林居凡七年而卒。贈工部尚書。

林 錢

林錢字克相。閩縣人。正德十六年進士。除浙江道御
史。巡按山東。建言降萬陵州判官。告病。

葉 奇

葉奇字弘偉。閩縣人。正德十六年進士。除廣西道御

史以議大禮廷杖嘉靖四年巡鹽兩淮丁憂復除雲
南道巡按應天十年巡按雲南貴州致仕

本朝分省人物考卷之又七十

福建福州府

張以寧

陳亮

唐泰

陳祖

陳仲完

王偁

陳子晟

陳仲晉

陸引

王孟

林鴻

黃童

洪順

王鍵

王善

嚴烜

李興

姚銑

陳登

陳全

馬鐸

李騏

林文秩

高棟

林紹

歐道江

洪英

陳復

孫芝

高旭

黃鑄

何宜

韓弘

林錦

陳鴻漸

王克復

林廷選

鄭建

薛廷寵

鄭天佐

蔡以俊

鄭炎

補遺

王德溢

林璟

林塘

鄭世威

吳文華

本朝分省人物考卷之又七十

福建福州府

張以寧

張以寧字志道古田人賦質清粹神采燁煜襁褓中卽嗜讀誦甫六歲日記千言嘗與羣兒遊寺中僧人難之以對寧隨口酬應屬對超卓聞者歎美入歲時人訟其伯父逮於獄寧忿不能平詣邑伸理令異其言論有條命賦琴堂詩立就且出語新奇伯父由是得釋年十五承父命往寧德受學於韓古遺歷五年方歸學業大進登元大定丁卯進士第累官翰林旣

入國朝拜翰林侍讀學士朝列大夫知制誥兼修國
史每承顧問多所裨益賜誥褒諭恩賚特厚焉洪武
己酉夏六月奉命齋詔印使安南封其國王未至而
王卒國人請授其世子不聽遣人請命於朝且教其
世子服三年喪并令其國人效中國行頓首稽首禮
朝廷嘉之賜以勅書比之陸賈馬援并御製詩八章
以獎諭之未幾得疾卒

陳亮

陳亮字景明長樂人故元儒生也其學無所不窺明
興高皇帝累詔郡縣徵遺逸或推轂亮亮曰昔唐

堯在上下有箕穎吾投迹明時遊戲泉石間吾志慊
矣吾豈願仕哉遂掉頭不出作讀陳搏傳詩以見志
山中有小樓號曰儲玉購四方名書藏之又作草屋
滄洲中與名士王恭高棟爲交日相與揮毫談藻暇
則汎閩江歷名山投上方蘭若尋僧問偈意豁如也
時時往還三山中爲九老社以此自終亮爲詩冲澹
悠然有陶孟之風

唐 泰

唐泰侯官人洪武中登進士授行人擢浙江按察僉
事永樂中陞陝西按察副使卓有能聲卒於官泰善

聲詩與黃濟輩號閩南才子所著有鳴缶集

陳祖

陳祖長樂人洪武中以明經薦授新繁縣丞道遇一
嫗哭甚哀問之嫗曰夫與子俱喪止餘一孫十歲昨
爲大蛇所吞祖令具狀移牒城隍限日引蛇赴公庭
至期果有羣蛇集廳下祖諭曰無與者退得罪者償
命獨一大蛇伏不去卽以劙畫地蛇乃就殞民以爲
異政立祠祀之

陳仲完

陳仲完長樂人洪武初自教官入翰林爲編修兼左

春坊左贊善爲人溫厚質實與物無競平居寡言至
於論事據理義無所回撓嘗有詔汰在京諸司冗官
時仲完掌坊事卽提筆書其當畱某當汰衆皆服其
明決被汰者亦自愧伏奉命授 皇孫經多所輔益
歷官二十年不遷怡然自足 皇太子恒言春坊如
陳仲完不易得也未幾卒于官

王 偕

王偕字孟敷永福人其父翰元季爲潮州路總管棄
官走閩爲黃冠棲永泰山中十年 高皇帝聞翰賢
詔有司強起之翰自刎死時偕甫九歲閩吳海者翰

直友也義撫偁教之洪武二十三年偁以經義舉於鄉明年試禮部不第例就祭酒授業因而求鄒魯之遺風與海內賢豪上下其說居數年遂疏乞歸終養文皇帝卽位有司薦起偁旣至都下遂自陳願處敎職以勵人才不許授翰林檢討進講經筵已而勅修永樂大典偁爲總裁官大典成英國公張輔奉命征交趾表偁爲護軍交趾平輒復叛以故移官交趾而叅議解縉者偁故遊也坐言事下獄或斥偁爲黨遂同逮繫偁尚氣節雅志當世吐論英邁好揚人善其詩本於李白意矯矯然不可羈也有虛舟集

陳子晟

陳子晟字仲昭連江人少喜讀書嘗從金華宋濂學領洪武四年鄉薦入太學選爲荆王府伴讀贊諤敢言荆王甚敬憚之未幾還京師卒年僅二十有六子晟性敏而志專每朝退輒觀書繙文不少怠時天台方希直號稱名儒亦雅重子晟之文其葬也希直爲銘其墓

陳仲晉

陳仲晉長樂人洪武六年由儒士拜江山知縣有惠愛於民上特旨褒嘉之子登字思孝洪武中亦由

儒士拜羅田縣丞永樂中入爲中書舍人工篆籀名重一時

陸引

陸引字惟遠羅源人嚴毅方正不泛交游洪武中以材薦入見 上問爲政治民之術引對稱 賦授象山縣丞抵任鋤強植弱吏畏民懷俸祿之外計口植蔬以給食家人不知魚肉之味甫二載以憂勞得疾一夕城隍廟闌者夢人傳呼新城隍蒞任問其爲誰曰陸丞也驚覺引已氣絕矣

王孟

王孟字文清福清人洪武中以明經薦授如臯教諭復改鹽城陞國子博士經其誘掖者咸有成就薦陞大理評事審讞明允獄以不冤尋陞汎陽知州善於撫字州民德之永樂中召修大典卒于京師孟性勁直居官以誠慤爲本所至俱有水滸聲其文章亦似其爲人

林鴻

林鴻字子羽福清人少任俠不羈讀書能強記高皇帝時部使者以人才薦授將樂儒學訓導居七年擢拜膳部員外郎高皇帝臨軒試龍池春曉孤鴈

二詩一日名勤京師是時鴻年未四十高皇帝治
尚操切而鴻性脫落不善仕又以爲散秩無自表見
遂自免歸益閉門謝客肆力爲詩遨遊三山間晉
陵人浦源與鴻同仕以詩來謁出所懷詩授之曰以
此相評耳讀至雲邊路遼巴山色樹裏河流漢水聲
驚歎曰吾家詩也相得益歡因避所居舍日與爲詩
由是浦僉人詩名藉甚其後閩人言詩者皆本鴻所
稱林敏陳仲宏林白環諸人皆鴻弟子

黃童

黃童字仲器古田人三歲失怙事母盡孝奮志篤學

永樂中以楷書徵入文淵閣繕寫大典書成當拜官
恩母老遂乞恩終養後累徵不起以壽終

洪順

洪順字遵道懷安人永樂初登進士選庶吉士引見
上親勉以立志進學久之授刑部主事時有李將軍
者詐取囚五十金反誣吏張緣受之同列畏李之強
皆欲坐緣順曰李固可畏張緣其不可憐乎竟寘李
於法仁宗監國稱其廉潔持法賜勅褒嘉未幾以
事左遷行人尋命與修五經四書性理大全諸書
丁外艱起服陞山東按察司僉事時山東遭唐賽兒

之亂順剗弊端寬撫循凋瘵惟恐不及值歲旱蝗順
發倉儲數萬賑之不待上報尋陞按察司命下而
卒所著有雞肋集

王鍵

王鍵字時鑰候官人永樂中以茂才薦授繁昌縣主
簿改山陽秩滿有最績賜勅命以褒榮之擢陽江
知縣卒鍵善詩有鼓缶心聲二集

王善

王善字師舜候官人永樂中舉進士授南京刑部主
事常以仁恤爲心訟一訊立辦有誣善受賊者上

因其入朝畱之密使人檢其家惟得所賜鈔半錠上乃稱其爲清勤公謹之臣秩滿陞行在刑部郎中尤畱心恤獄刑無濫及宣德中陞雲南布政司左叅議惟嚴大體不務苛細麓川叛善進兵金齒備禦值歲飢蠲僧寺徭役令出粟數萬活者甚衆雲南永寧府土官與四川鹽井衛爭地累年仇殺不已都督沐昂檄善爲之剖折皆帖服去尚書王驥及昂俱欲薦之善力辭乞致仕歸二十餘年卒年九十有三

嚴 焰

嚴焰字熙叔懷安人永樂中以楷書與纂修例授入

品秩辭乞歸養卒業後登進士第監察御史奉命按山東歲旱民饑奏蠲其科稅大發倉廩以賑之復按畿甸及四川河南皆有聲稱陞浙江按察司僉事處州徐子舉作亂連坐者五十餘人烜悉散遣復業侍郎成均奉詔考察庶寮有毀之者遽送吏部改職烜遂陳情乞歸學校以便養親除金華敎授卒烜性至孝少時祖母陳疾篤每夕禱于北辰求以身代且剗股肉和粥以進居官三十餘年屋不增一椽業不增寸地士大夫稱之所著有師韋齋集藏于家

李興

李興字希傑懷安人永樂初由國子生授太平府推官以廉慎持身以公恕折獄用薦者擢戶部郎中人不敢干以私丁內艱家居終喪不出戶陞知嚴州府有惠政於民宣德中改知廣州府興利除弊務欲順民情不避權勢秩滿去任行李蕭然

姚銑

姚銑字孟聲候官人登永樂甲辰進士宣德初拜刑科給事中丁內艱起復改工科正統間引疾家居凡七載藩府大臣以其才可大用疏薦於朝遷兵科都給事中是秋大駕親征北虜選侍臣扈從銑與焉

將行自策其必敗既旋師至土木竟死于難銃儀貌
端偉器局夷曠自入仕歷廿餘年如遷一級義命自
安不求躁進竟以王事卒士大夫多惜之同縣人
陳鈍懷安人周傑俱登正統間進士爲戶部員外郎
皆以扈從同死于難

陳登

陳登字思孝長樂人永樂甲申詔吏部簡士之能書
者儲翰林給廩祿將用之清密之地登以篆籀稱最
時吳中勝用亨待詔翰林工篆籀自視天下無愈已
者每輕後進往往折屈之稠人廣坐中登初至謹默

謙下用亨連抑之孤卿幼晚代爲不堪登怡然自若
從容進曰登幸辱在此得以親聆教益自揣愚陋願
有所質以許叔重說文十數事相辯難登議論娓娓
皆用亨素所未諳者乃始默默斂鋒鍔不復自矜大
登聲譽遂起於六書本原精考詳究志篤而力勤周
秦以來二千年間其石刻有委棄山顛水嶺荒蕪瓦
礫之墟者皆深求而必得之雖殘缺剝落歲月氏名
無可考然審度某代某人十率中其七八收畜之富
蓋歐陽文忠趙明誠之後所僅見也初舉才學爲湖
廣羅田縣丞數月改浙江蘭溪丞月餘又改江西浮

梁丞所至視民如子務在寬恤而明決敏斷以革奸除弊在浮梁時房安爲江西按察使每峻威以待屬吏獨禮遇登歲餘丁內艱去服闋選入翰林仍給縣丞祿歷十年擢中書舍人朝廷題扁率出其手四方求者無虛日未嘗有厭倦意年六十七卒

陳全

陳全字果之自號蒙菴長樂人未生之前四日父卒賴母鞠於哀苦之餘得以成立全事母甚孝從族父江山令仲晉受業以穎悟稱甫十齡亦卽能詩工制舉藝永樂乙酉夏偶宴集于旅中園亭醉臥樹下右

二紅蛇交繫其腰或曰勿怪此綏徵也是年果領鄉薦明年會試廷對賜進士第二人擢翰林編修預修永樂大典書成被召赴行在修性理大全諸書受

賜賚陞侍講後署院事屢典文衡克精藻鑑其爲人謙和篤實居官慎密公勤一日聞母宜人訃至故事京官有喪皆赴行在請命然後歸葬時全適有疾且值嚴寒或勸少待疾瘳冰解而後北行曰有是哉死生命也吾爲君親不得顧此遂行在途一如喪次哀痛輟還至南京越十三日而卒年六十六有蒙菴集

若干卷藏于家

馬 鐸

馬鐸字彥聲號梅巖長樂人永樂壬辰進士第一授翰林修撰 車駕兩幸北京皆留侍監國 仁宗皇帝屢顧侍臣曰馬鐸可謂質實無僞者也自是翰林學士國子祭酒有公務出皆命鐸攝其事嘗建言國子監分獻宜用翰林院官朝廷從之鐸爲人坦直無岐岸於經史百家多所涉獵爲文援筆輒就卒於官

李 騏

李騏長樂人永樂戊戌進士第一初名馬 文廟親改今名爲人耿介有氣節不肯媚媚依隨仕終翰林

修撰

林文秩

林文秩字禮亨懷安人少穎敏不凡常於田間觀穫
值迅雷掣去數步傍有擊死者文秩恬然不少懼永
樂中登進士第改庶吉士拜監察御史立朝有直聲
巡按南畿風裁凜然民奏畱之 詔復巡按一年宣
德末擢山西按察副使進按察使有告平陽王文簡
妖言惑衆者連及三百餘家文秩力爲辨釋存活幾
二千人後致仕卒弟文秸字加亨亦有異質與文秩
同舉進士爲庶吉士拜王府審理改岳州府通判爲

朱秀
政簡約務以撫字爲心嘗爲雲南考試官有囊金數百兩求登薦書者峻却之未幾卒所著有梅湖稿

高棟

高棟字彥恢號漫士後改名廷禮長樂人博學能文尤雄于詩雖談笑奮筆而精思力摹莫及棟與王恭頡頏齊名殘膏賸馥所沾溉者多初二人自布衣召入翰林爲待詔陞典籍平生賦咏流傳海內有稿曰嘯臺集曰水天清集其選唐詩品彙拾遺正聲凡百餘卷議者服其精博能書工畫時稱三絕書得漢隸筆法畫原于米南宮父子在翰苑二十年四方求詩

畫者爭致金帛修饑歲常優于祿入神瑩氣融襟懷
高簡善飲酒喜談謔與人無賢愚新故益然如一素
強無病晚得風眩疾歲輒發竟以此終

林紹

林紹字淳裕長樂人能詩尤工於五七言長律邑人
王恭王堅交章薦于朝下詔徵之竟不起有集曰林
泉清響藏于家

歐道江

歐道江長樂人博學洽聞時譽大振四方從遊者無
慮數千人卒門生刑部郎中王堅致仕歸爲營墓葬

卷之二十一

十一

朱秀

之

洪英

洪英字實夫懷安人永樂乙未會試第一入翰林爲庶吉士學問宏肆擢禮部主客司主事歷吏部文選考功主事端謹著稱進考功郎中陞山東左布政使正統己巳胡寇犯順陞都察院左副都御史巡撫山東督役夫城臨清築運河堤有功景泰壬申進右都御史巡撫浙江會有旨考察百司賢否以行黜陟英惑於左右之言去取有未當者因懇乞致仕歸未幾卒英爲人端重詳雅在官不務赫赫之譽而廉謹長

厚去後人懷思之

陳復

陳復字鼎初懷安人永樂未舉進士授行在戶部主事戶部號劇司復處之從容暇裕游刃有餘正統間知杭州府存心公正蒞政嚴明而濟以寬靜月朔望必懇諭耆老使言民間利弊而興革之杭尤號煩劇復治之幾於無事公堂端坐讀書時與郡吏講解律令以銷永日尋丁內艱去九邑之民如失父母相率詣當道乞畱者凡七千餘人省憲以聞詔奪情視事未幾卒貧無以爲殮浙江按察使軒輓倡爲賄贈民

爭饋遺之其子悉却不受曰吾父生平志在清白忍以貨汙之哉假貸以歸其喪

孫芝

孫芝字廷秀連江人宣德中國子生授慶都縣知縣陞汚陽州知州時有建議欲刪削孟子書者芝上疏極論以爲不可上特俞之

高旭

高旭字時旭候官人宣德中登進士授吏科給事中丁內艱起復改兵科正統中陞江西按察提學僉事景泰初改本司提刑僉事卒旭蒞官平恕明慎其於

決獄多所平反有榕軒集藏于家

黃 鎬

黃鎬字叔高侯官人宣德間進士拜監察御史正統
末巡按貴州適苗賊煽變南垂道梗鎬簡精銳千人
率之斬苗一酋進至鎮遠鎬躬擐甲冑與賊戰屢敗
之時興隆清平皆被賊圍而平越尤急鎬被圍平越
九閱月士卒掘草根煮皮甲烹人屍以食鎬多方招
撫諸蠻勸諭賑濟人無叛心乃以竹筒密疏於朝調
官軍項背夾攻大破羣賊始解圍去在貴二年凡五
十疏上皆採納既而苗復蔓延湖湘朝議命鎬

往治之既一年湖湘又平陞廣東按察僉事丁內外
艱改浙江皆有風績復陞廣東左叅政迭破雷廉高
三郡之賊歷浙江按察使廣西左布政使擢都察院
右副都御史總督南京糧儲兼理屯田遷吏部左右
侍郎進南京戶部尚書年六十有四以疾懇求致仕
卒贈太子少保

何 宜

何宜字仁義福清人登正統戊辰進士第拜戶部主
事累遷兵部職方司郎中成化之初疆圉所多事邊
報沓至皆職方主之宜從容區畫 上聞裁處多稱

意旨及其施行人皆以爲得宜一時卿佐極加器重
凡有大議皆倚以咨決遷浙江布政司叅政終江西
左布政使所至以廉謹見稱

韓 弘

韓弘字士毅福清人正統己未進士授戶部主事歷
永平府同知以績最陞楊州府知府爲政愷悌正直
郡民懷其惠滿秩陞浙江布政司叅政景泰初三上
章乞致仕卒年八十有三

林 錦

林錦字彥章連江人舉景泰元年鄉貢授合浦縣儒

學訓導時蠻寇充斥內外無備錦規畫皆懸合機宜
都御史葉盛異之遂檄攝篆靈山至則患無城守始
據形勢立排柵設戰守拒賊知有備不敢嚮邇未幾
滿秩去民曰公去賊復來將無以保其生相率逃之
山谷中盛乃以狀聞請令靈山詔從之許馳驛之官
蓋異數也民聞之卽復來歸適歲大饑賊益熾劫掠
村堡無寧日錦單騎入壁諭以禍福附縣二十五猺
皆聽其命遠地不服者縱兵勦之天順壬午敗賊于
羅水又敗賊于黃岡嶺又大敗賊于新庄前後斬獲
千餘級鹵獲無算已而去排柵築土城徙縣治于中

成化丙戌以功擢守廉州歲復大饑賊掠清和鄉錦
肩輿諭解有千餘人不服者殺之經略還定一如靈
山戊子擢按察司僉事尋轉副使遂制置一道立數
百年長計設圖河營以禦西寇新寮營以禦南寇設
洪嶧營以塞寇出沒之路盜遂滅息庚寅巡視靈山
念土城不可以久遂城之鋗以磚石高墉連樓橫亘
五百丈遂成重鎮然自令至守臬一以教化爲務靈
山尚鬼好巫禁淫祠修學校勸民力農桑行孝弟治
學宮羣子弟教之拓民居以廣孔子廟廡郡士之勤
于向方者皆錦之教也禮義風行俗化丕振蒞官一

以忠誠仁愛而濟之計謨宏議其處分漢達軍民皆
經久可行前後三十餘年無在不爲生民造福計嶺
海多寇請立總制府于梧州萬里倚爲干城屹無兇
孽其功尤大云

陳鴻漸

陳鴻漸字廷儀連江人登景泰辛未進士拜刑部主
事察獄明敏而用法平恕累遷廣東司郎中其所分
治實權貴所在時權貴之勢方張噓吸能死生賤貴
人而挾勢庇奸請托紛至鴻漸一以至公處之屹不
爲動然其素守廉慎竟亦無間可乘也嘗奉 命獻

獄於常州州人袁重賄欲賂之無敢通者其同事乃
權要武臣鴻漸與之同寢處而委曲防範之卒亦不
得交一言而去後以親老遂乞歸養居家餘二十年
確然不易其素守士論高之

王克復

王克復字師仁福清人天順元年進士授刑部主事
歷陞員外郎郎中江西左右叅政歷官副都御史南
京吏部右侍郎得請歸老家居十餘年卒訃聞賜祭
葬如例克復縝密有幹局御下嚴切吏不敢欺人目
之曰王燈籠其在刑部以勤慎稱總督兩廣都御史

吳禎不法往按之甚協輿論在江西先後十餘年勳名尤着

林廷選

林廷選字舜舉長樂人登成化乙未進士授蘇郡推官廉明仁恕屢決疑獄民稱青天拜監察御史巡按廣西適夷寇猖獗謀諸總鎮平之詔增俸一級賚白金文綺擢浙江僉事副使溫處鑛徒煽亂諭解歸農歲大祲設賑活民萬計宦浙最久凡官舍所需必遺人於他省市之觀風使者密廉有司強市民間物獨林按察無有也歷深望重南臺會薦以臬長入爲大

聖卿鞠讞多所平反以右都御史奉詔鎮兩廣盜賊充斥專意招撫梗令者不得已而後征之入疏乞骸骨歸溫旨慰留晉南京工部尚書乞休益懇賜璽書馳傳歸有清慎才明允遂高尙之語有司月給廩歲給役卒賜祭葬贈太子少保

鄭 建

鄭建字弘中別號淡泊福清人自幼敦重樸雅讀書日記二千餘言及長從副都御史洪英學英大器之登宣德丁未進士第爲庶吉士一日上御文華殿召試諸葛孔明可與興禮樂論考居第一賞鈔一百

錠仍命讀書期以大成未幾以直言見忤當道黜爲
南雄通判旣抵任知郡民避徭役逃竄者多于是不
避險艱徧歷屬邑以招徠之仍具奏乞免逋負不數
月民悉還定內艱去職民遮道攀畱覓間道乃始得
行服闋謁選天官時值閩浙之交民盜銀鎖相爭至
有與官軍拒者 上命處州專設通判一員以蒞其
事建旣至諭民以禍福且爲平其力役民遂以寧銀
課亦不勞而辦條閩寇鄧茂七嘯聚流民越界攻掠
上命大臣督兵勦擒建時分守龍泉偕其子躬擐甲
胄率民兵與賊抗者數日斬首五百餘級龍泉以平

尙書石璞委以掃除餘孽建直抵其巢察其情皆良民不過被寇勢挾而烏合之者悉諭以歸農得其被虜男女二千餘口以還其家秩滿述職奏留陞同知復以平寇功陞食三品俸廷議銀場非得人以綱紀其事則不可改陞浙江按察司僉事卒于官

薛廷寵

薛廷寵字汝承閩人嘉靖十一年進士以行人選給事中奉使朝鮮還擢都諫廷寵在諫垣每誦季孫行父之言見無禮於君者若鷹鸇之逐鳥雀也竊有志焉嘗上疏劾諸大臣皆當時用事者屢欲出之外藩

具名以進 上言廷寵賢不宜使去左右乃止未幾
卒家貧無以爲斂鄉人爲治其喪廷寵內行修事繼
母李孝李有子恒依廷寵居其卒也李哭之哀感傍
人繼室衛京師人時年十九衛父母憐其少又閩道
萬里欲畱之衛不可竟扶柩間關返獨處一室卽薛
氏親黨罕覩其面遇廷寵忌辰張遺象慟哭年四十
餘卒

鄭天佐

鄭天佐號金峰福清人宋名臣俠之裔登嘉靖甲子
鄉薦上公車不第念母俞太宜人年老欲乘時祿養

謁選而得山東霑化諭以廉褪躬以寬敷教造就有
程士皆勵於名行陞桃源令廉謹不阿邑有巨賈固
子生恃當道戚險蟄鄉里因寺僧一言之忤叱僕夜
縛於樹縱火焚之當道欲從寬政佐訊繫如常生度
不能脫竟自縊死六年陞惠州府同知先是天佐之
叔孟周曾爲歸善尉邑有鄭清尉之謠聞佐至則云
清尉之姪來矣半刺惠州益務砥勵循聲蔚起抵兩
臺赴憲者輒願批鄭青天後竟成謠誦曰縣遲延府
一年但願批與鄭青天訟無滯民無冤兩臺疏其謠
于薦剡時惠苦倭寇佐專理海防撫循軍兵有如挾

續寇至指授方略偕粵帥俞大猷親冒矢石禦敵斬
馘惠賴以寧陞貴州思州知府任甫三月以母太宜
人衰老難以遠從之任請告終養考終于家佐生平
力敦孝友以操行爲鄉評重居官廉惠著聞爲民除
患興利直行己志雖死生亦不顧也至今惠人德而
祠之湖西

蔡以俊

蔡以俊福清人少穎悟凡經史諸子靡不該洽至老
手未嘗釋卷人號曰蔡書樹隱居教授不求仕進卒

年八十

鄭 炎

鄭炎懷安人性淳謹隱居教授暇則課童僕耕稼不慕營利其大父潛嘗刲義學於瓜山之陽炎每值朔望必幅巾深衣率諸生致敬於先聖先師平生一語不妄發至啟牖後學亹亹不倦劬苦攻書至老益篤學者皆嚴事之

補遺

王德溢

王德溢字懋中福建連江縣人永樂四年進士由蔥谿知縣選雲南道御史巡按長蘆以劾權貴罷歸起

補湖廣道巡按廣東落職丁憂服闋謫松江府推官陞徽州府同知南京刑部郎中廣西僉事告病

林 璞

林璟字繼文福建侯官縣人景泰二年進士由戶部主事改雲南道御史建言謫湖廣便水驛丞天順元年起長沙知縣調容城縣陞曹州同知致仕

林 璞

林塘侯官人冲晦不爲時俗炫耀與人居端默無言至臨事卓犖不可及弘治中授監察御史上慎名器重國本七事而直斥柄臣非才巡雲南言孟密不當

立安撫行階亂事又言鎮守故違玩其制諸所造瀋
侈宜鎔毀母以上供而孤鼠爲幽奸者薰灌殆盡代
者繼至殊不樂然心敬憚之黔國有椽史張聰者盜
柄受賊事覺塘竟置于法叅將縱麾下私于崖徭奪
印殺人塘覈論叅將坐落職土官子安乃父坐事死
獄中首貪賴其田誣乃叛普賴土官弟與嫂爭田嫂
誣以通黑腳夷入寇皆繫獄十餘年被累死者百餘
人矣塘駁之曰乃誠叛從叛者何人爲寇暴何鄉黑
腳夷誠入寇寇且三千人當有羽檄調發可覆也事
得自白自餘平反甚衆

鄭世威

鄭世威字中孚號環浦福州府長樂人嘉靖己丑進士授民部僉江西憲臬適貴溪夏相國方召入兩臺藩臬詣第脩謁率由掖門呼闈者語之相國尊柰何令邦大夫蹜蹜而旁趨還吾刺去耳闈者錯愕闊中門乃入汪巡撫立錫偕夏有事上清宮以祝釐爲名藩臬皆從視祝辭爲相君祈胤耳怫然而出強之署名不應夏固已心恚之矣頃之轉叅浙藩適夏再入相取道武林諸大夫郊迎所不能致者獨世威一人耳已而復以臬副蒞江西時分宜柄國勢張甚族

黨武豪所司不敢問朝以三尺綱之制
姻也以輕直占寺田千餘畝會歲祲估平直鬻田賑
饑熊持嚴手書冀減直竟以成案報分宜恚怒甚于
貴溪矣已遷蜀叅政念分宜父子終將蟄已遂投劾
歸歸十年而分宜敗擢僉內臺晉少司寇會 詔採
珠及珍石疏乞納忠諫崇節儉不報遂引疾乞骸骨
歸環堵蕭然薪粢不給食指故少悉屏去僅蓄二三
蒼頭習耕者躬爲督作灌畦種蔬陶陶如也享年八
十有二而卒

吳文華

吳文華字子彬號容所福州府連江人嘉靖丙辰進士授南兵部主事適三殿工興內璫主進顏料牒所司具舟三百艘裁其半璫怒脅以危言徐應之曰中貴人多索舟欲爲市販地耶夫使舟不任載責在郎使舟任載而故爲逗留以乏上供責在中貴人璫無以難逡巡去累官至河南左布政未抵任適大計群吏天子脩曠典旌治行異等二十五人而文華登之督檢汴志得革除死事諸臣鐵公鉉等五人建祠祀之又脩太昊陵及濬復南陽水利晉應天府尹丘汴所積羨金萬餘石藏吏具籍進請納諸行李不即

牘而白之臺使不應第以籍授代者充公帑而已其
廉不近名如此已晉右副都御史撫粵西六年寨徭
突出爲患檄叅政陳應春勦平之昭平賊首黎福庄
父子聚衆剽掠執孝廉歐鳴鑾索金以贖聞之佯爲
不知會督府徵師討羅旁兵盡東乃陰畱數千人屬
裨將韓文啓掩擊之斬福庄乘夜攻下五指白帽諸
峒捷聞陞俸一級後柳州賊巢地名北三聚黨萬餘
慄悍善騎射號刻馬賊諸將喟縮無敢嬰其鋒適河
地有驚選卒七千俾叅將王中化往勦旣得捷卽馳
檄諸將曰吾名攻河池耳意固北三今河池捷北三

謂我兵疲且休矣擊之必勝遂督兵分道以進賊果不爲備連破七十餘巢斬四千八百捷聞相國抑其功僅賜金幣錄一子太學晉戶部右侍郎念母夫人春火高陳情終養時相國方奪情諸言省侍歸養者皆惡聞獨觸忌諱不顧也後母夫人歿相國殂復以臺章薦擢摠督兩粵在任三載屢平竊亂遄發遄撲無使滋蔓每命將出師授以方略輒懸合機宜往無不克而尤洞于應變當上下皇遽之時從容籌論寬若有餘卒不勞而底定改南京兵部尚書參贊機務會中官有怙權恣睢者爲言官所劾上怒杖言官

于廷乃率南九卿抗言宜治璫罪宥言者語甚切直
不報遂引疾乞休三上得允優遊十載無疾而終享
年七十有八